



Aqqalu C. Jerimiassen
Atassut

UKA 2021/72
21. oktober 2021

Uani qinigaaffimmi Ilulissani GUX-imik pilersitsinissamut suliaqarnissamik Naalakkersuisut peqquneqarnissaannik Inatsisartunut aaliangiiffigisassatut siunnersuut.

(Inatsisartunut ilaasortaq Nivi Olsen, Demokraatit)

Ilulissani GUX-eqalernissaanik isuma Atassummiit toqqaanaq taalluannarlugu isumassarsiaasoraarput kivitiinnassallugu pisariaqarsorinangitsoq, oqallisigilluaqqitassaasorli.

Kisiannili, uani isummat aallartinnermi oqariartuutigineqartut tunngavilersuutigineqartullu akerlilikannilaassallugit tunngavissaqarsorivunga. Tassami aallaqqaataani taaneqarmat, inuusuttuaqqat angerlarsimaffitsik toqqissisimanarisartik najuinnarusuttaraat.

Nammineq misilittakkakka tassani atulaarsinnaavakka, Qaqortumi 2004-imi HHX aallartippara, qilanaarutigisimasamalu annerpaat ilagisimasaat tassaavoq nammineq inuuneq misilissallugu imminut isumangaluga, imaatsinngitsoq angajoqqaannik isumalluuteqartuaannassallunga. Ilimaginngilaralu aamma angerlarsimaffik qimannagu pisimagaluaruma peroriartorninnutaaq ullumikkumut killiffinnut allaanerungaartumik kinguneqarsimassangaluarpoq.

Angerlarsertarneruna kisimiillunilu imminut isumagisinnaanermik akisussaaffimmik tigusineq perorsaatit tamani annersaat.

Aajunali maana piviusoq allanikkajaajusoq allanut sanilliussassaangitsoq, Avannaata Kommunia nunatsinni Kommunini kisiartaalluni ilinniarnertuunngorniarfeqanngilaq.

Avannaata Kommunia tassaangaluarpormi inuussutissariornikkut sulinikkullu nunatta aningaasivissuisa pingaernerpaapajaartaattullusooq inissisimasoq. Ilinniarfeqarnikkulli ingasaannangajattumik katataaqqasoq.

Siuarsaaqqissangaannilu, maanna periarfissat pioreersut isiginiarneqartariaqarput. Assersuutingalugu Perorsaanermik Ilinniarfik Ilulissaneereerpoq, sulilu alliertortinneqarsinnaanermigut periarfissaqarluarluni, taassumallu atorluarneratigut ilinniarfik pioreersoq inerisaqqinneqarsinnaavoq saniatigut GUX-italerlugu, siunnersuuteqartup allanneratutaaq, Avannaani Ilinniarnertuunngorniarfiulluunniit immikkoortortaat, inulerinermut sammiveqartumik ingerlasuutilluguluunniit, tamanni assersuutaannaavoq. Tassangaanniillu taamaalillutitaaq ilinniartuusut GUX naammassereernerani Bachelor Pædagogimut ingerlaqqiffigisinnaalissallugu. Taamaaliornikkullu piviusorsioruusorinarsinnaavoq, uani qinigaaffimmi isumatusaartumik pigaanni Ilulissani GUX-imik pilersitsisoqarsinnaasoq.

Siunnersuut Atassummiit iluatinnaateqartipparput, Ilinniartitaanermullu ataatsimiitsitaliamut innersuullugu.